

金華黃先生文集

八



金華黃先生文集卷第二十七

續葉二十四

神道碑

臨川危素編次

番易齋耳校正

御史中丞贈資政大夫中書右丞上護軍追封平陽郡公
謚文靖徐公神道碑

公諱毅字伯弘姓徐氏世為平陽趙城人家于霍峯鄉石明里
高祖諱澤曾祖諱潤皆力本尚義值金季之亂晦迹弗耀入

皇朝始有出而仕者祖諱玉由元帥府都提控歷崞縣提領岢
嵐州長官終於河東南路提舉常平倉事御史中丞王公傳文
銘其墓累贈嘉議大夫上輕車都尉追封平陽郡侯祖妣高氏
平陽郡夫人考諱德舉由尚書省掾出為平陽路轉運司經歷
終於太原路監使司提舉翰林學士承旨姚公燧銘其墓累贈
中奉大夫護軍追封平陽郡公妣盧氏邢氏並平陽郡夫人公

盧夫人出也幼穎異以歲受業於魏國許文正公磨礪浸灌日長月益以清方勁正爲衆所嚴憚莫不以遠大期之弱冠辟掾調同知檀州事當國者急於賦歛督責甚峻郡縣長吏奉承如恐弗及公獨不阿其意惟務布德澤以甦疲瘵人稱其有古循吏風

世祖皇帝聞其名擢監察御史上言江南新附未久宜隱卹流亡以固民心京師天下根本宜蠲除地稅以厚民力檢覈災傷宜以時而發倉廩之儲捐山澤之利申明酒禁以脩荒政鰥寡孤獨宜有養民所疾苦宜遣使詢問方今庶政姑息中書親細務而宰相失體六部僚屬多非其人因力陳省臺為治之要及憲司事宜監治官吏當加儆戒不可因人之証言而升降察官行樞密院行大司農司行通政院及尚書省理筭受賞進官者

皆可罷又以日食地震乞罷諸行省四川妄啓邊釁交趾虛勞
王師獻策以邀功生事者宜勿聽官軍承襲皆膏粱子弟未嘗
知兵當別議立法增國子之員重教官之選以興學校治宗廟
以崇祀典脩國史以存故實設朝立班不可全無流品之分實
封陳言毋使苟爲進身之計它如選用官吏減錢糧之費理婚
田之訟馬禁水利監鈔諸法其弊當救者前後所奏七十餘疏
其言後多施行

世祖賓天上封事于

太皇太后皇太后曰四海不可一日無君

大行皇帝奄棄天下已五日矣苟非早定大策萬一或啓姦覲
變生不測實可寒心

皇孫撫軍朔漠

先帝旣授以

皇太子寶聖意可知伏願明諭宗藩大臣叶

謀推戴遣使奉迎歸正大統上以副

先帝之遺意下以慰四海萬民之所屬望廷議韙之

成宗皇帝既踐天位首請早正

東朝尊號以嚴孝養因言

陛下方虛心求治而大臣不肯任事人主之職在論一相今宰

相負太多論議不一伯顏乃先帝舊臣留以遺

陛下宜亟

相之爲治不在過求高遠但當遵守舊制其要有四親賢速佞

信賞必罰而已又伏闕上言建立儲二敦睦宗藩選任臺諫教

習親軍勿事西南夷而專備北邊赦不可數等十事所上疏又

二十餘

上皆嘉納焉擢僉陝西漢中道肅政廉訪司事未

上改吏部員外郎時選曹事多壅滯公不避權勢凡銓量注擬

必考其資歷察其才品人皆悅服奉

詔使甘肅給軍儲糴

買轉輸規措有法事集而民不擾除僉河東山西道肅政廉訪

司事閱所部獄囚而得其寃狀所釋五百餘人時稱明乞召爲
徽政院長史舊例臺察於徽政之事一無所問公謂法者天下
之公器宜共遵而行之臺察者執法之司何獨不得與聞徽政
之事乎有與公不相能者力詆之公即謝去尋除樞密院經歷
贊決事機申嚴號令本兵者賴其欣助爲多遷御史臺都事改
右司郎中除陝西行臺治書侍御史並以外艱不赴服除召爲
左司郎中夙夜匪懈彌綸庶政損益必中其度列曹咸取
則焉擢治書侍御史柄臣欲構害御史郭章公力爲之辨有沮
之者事竟報聞公以言不行自引去召還授陝西漢中道肅政
廉訪使關右地接羗戎人多強悍號稱難治公柔之以恩而懾
之以威土俗爲之丕變入爲刑部尚書上言自昔有國家者必
定律令使有司知所遵守方今承平日久宜參酌古今立一代

之成法

上可其奏仍命總其事方次第就緒未及上而改

授河北河南道肅政廉訪使無何復入爲刑部尚書擢侍御史除僉樞密院事

仁宗皇帝在儲闈素知其有公輔之器及正位

宸極擢江

南行臺侍御史遷燕南河北道肅政廉訪使召赴

闕遂參

議中書省事頃之拜陝西諸道行御史臺御史中丞力辭而歸

每謂人生未老得閑乃爲貴吾年周六甲歷事

四朝恒以

無能補報爲懼安敢昧止足之戒乎延祐元年十二月二十六

日以疾薨于里第之正寢享年六十有一某年某月某日葬某

鄉某之原公累階資善大夫訃聞

上嗟悼不已

詔特

贈資政大夫中書右丞上護軍追封平陽郡公謚文靖仍命詞

臣爲贊書以褒寵之娶裴氏封平陽郡夫人子男一人宗義亞

中大夫衡州路總管女四人長適常德路總管裴宗文次適姜某夫亡年未三十即歸居父母家今已七十餘次適朝列大夫曹州尹麻鄰次適敦武校尉某處推茶提舉王琦孫男二人倅倅公遺書有奏議五卷詩文三卷翰林學士吳公澄爲之序惟公以純實之資克承正學遭逢聖代爲時名臣雖雅志恬退而造次不忘於愛君憂國光膺茂渥生榮死哀不亦宜乎公歿之歲潛始舉進士至京師三十有五年公孫倅以墓隧之碑未建介翰林脩撰王宗哲以銘來屬潛雖不及游公之門而覲其光儀聆其聲欬讀公之書而論其世君臣之際何其盛哉序而銘諸史臣之職也曷敢以不敏辭銘曰

惟公之先隱願以時再世外官不大厥施委其餘祉伊公之貽公初筮仕華問四馳擢寘臺端用副倚毗作

帝耳目爲國

蒼龜

宮車晚出人心危疑盡言無避神器有歸出將使指
風紀是持入綴從班獻納論思乃降宥府乃陪宰司訏謨遠猷
贊襄萬幾峻陟文階執法太微胡然遠引莫可屬轍公身在外
忠愛不衰庶公復來赤舄衣遺表上聞 當宁齋咨一鳳
之鳴六龍以飛申錫寵褒厥有制詞有封若堂昭以銘詩

泚海上副萬戶石抹公神道碑

至正七年冬十月二十七日武德將軍泚海上萬戶府副萬戶
石抹公終于台州之私第卜以某年某月某日從葬于柳城之
先塋公諱明里帖木兒別名繼祖字伯善迪烈兀人其先出於
梁蕭氏隋蕭后以族入于突厥后歸唐而其族留突厥至遼爲
述律氏仕遼多至顯官金滅遼改命爲石抹氏曰庫烈而者於
公爲六世祖義不仕金望日再拜而卒曰脫羅華察耳者於公

爲五世祖承先志亦不仕其第二子曰也鮮公高祖也問父何爲不仕父語以其故慨然曰兒必復之金主聞其材武多智召爲奚部長固辭弗獲乃俾兄瞻德納姑受之以全其宗遂避去之北野山射狐鼠以食誓不食金粟聞

太祖皇帝龍興朔漠乃杖策來歸謁拜于九旂白旗之下言東京金人根本之地得東京則金何圖

上即命取東京師次

高州與之千騎使爲前鋒謀知東京新易留守出奇計獨與數騎邀殺之遂入東京得地千里戶十萬八千勝兵十萬進攻北京三年而克之得其守將四十有七城邑二十二有

旨以

北京族拒王師當屠力諫止焉特授御史大夫領北京達魯花赤別募精銳之士萬二千號黑軍以其籍來上賜金虎符加上將軍提控諸路元帥府便宜行事

太祖西征俾統乂漢黑軍偕諸將經畧中原徇地至蠡州死焉
曾祖諱查刺繼爲御史大夫統黑軍定河東陝西諸郡移師攻
益都城破衆欲盡殲降者堅持不可益都之人生爲立祠以黑
軍長驅入汴進拔睢陽

太宗皇帝疇其勞授眞定兼北京兩路達魯花赤祖諱庫祿滿
以黑軍與從弟度刺攻襄陽樊城

世祖皇帝念其祖父之功降

制褒諭賜金符爲總管與叛

將戰于濟南死焉考諱良輔以黑軍攻五河及湖南諸部宋平
論功行賞賜金虎符歷蔡州弩軍萬戶黃州招討使尋以公海
副都元帥開闢于四明會改元帥爲萬戶遂以爲公海上萬戶
府副萬戶累階昭毅大將軍由昭毅而上四世有傳在國史妣
莊氏封某郡太夫人公少負材而尚氣不肯爲人下大德七年

以門切入備宿衛事

成宗皇帝爲舍利別赤將

上旨禱祠山川所過州邑名人

魁士莫不器重之十一年昭毅公以老謝事

詔以公嗣其

職方是時承平日久黑軍散落之餘多已它屬

武宗即皇帝位

仁宗爲皇太子

上命悉括黑軍以衛東宮宗戚貴臣弗便

事遂寢公初以沁海軍分鎮台州皇慶元年又移鎮婺處兩州

馭軍嚴肅而恩意周浹當揀放而老且貧不能歸者曲爲之地

使有以自給而達於鄉里旅殯者累數百擇地爲叢冢聚瘞而

時祭之發之教場多餘地最爲沃衍相其土宜樹桑藝粟麥而

儲其入幕府勞徠供億軍中藥餌棺槨咸取給焉暇日則延師

儒咨諏善道士譽翕然居民亦樂其不擾往往形於謠詠江西

大盜起寧都冠贛州列郡皆警

朝廷命行省率臣親率諸

道兵往討之公預在行聞公所設方畧深服其決機之精即檄公爲行軍都鎮撫部郢復諸軍生縛其兇渠二人而乘勝擣其巢穴逆黨潰去元惡尋亦就擒乃班師凱旋處之遂昌愚民嘯聚竊發郡縣約官軍合捕公按兵不出單騎直抵其處責長吏失於撫字諭富家輸粟賑濟而團結保伍以自衛不旬日誅其首亂而歸其同黨三十五人于有司餘皆令復業如故兩浙之塩法積弊日滋行省俾公與轉運司官共整治之公訪求其致弊之源隨事釐革亭戶之凋耗者亟爲僉替使無缺役官課旣登而民間私煮盜販之害有未盡除事聞于上命行省擇所部萬戶歲一巡歷以申明其禁令公首膺茲選所至人莫敢犯或弗悛而麗于法立赦其罪未嘗留獄由是平民免於誣構株連

之患公復深究其利病酌古今之宜爲上中下三策行省以上
于中書事格不行有識之士以公言不可廢相與刻實郡庠人
至今傳之昭毅公旣老每懷鄉土之念捐館之日家僅存遺書
數千卷公弼其故廬爲舟車之費奉柩還葬柳城餘貲悉分諸
弟太夫人久留遼東因迎侍南來致其孝養諸弟相繼卽世撫
育其孤子至於成立嫁其孤女咸得所歸公初從昭毅公在四
明師事前進士史先生蒙卿先生沒公爲治葬且割田以祭焉
四明之學大抵祖六氏而宗楊袁惟先生上接晁氏之傳爲學
一本於朱子公天資穎悟凡先生所指授聞輒領解然不徒守
其空言而務在明體以達用自經傳子史下至名法縱橫天文
地理數術方技異教外書靡所不通而韜鈴之秘則家庭所夙
講商榷古今亹亹忘倦治法征謀如指諸掌公素慕爲奇節偉

行非常之功有志於當世而喜推轂士類志局于位弗克盡展
所蘊因自號北野元者年踰強仕即請納祿舉仲弟振祖以自
代樂台州山水之勝買田築室而居焉扁宴休之所曰抱膝軒
雅歌賦詩以自娛家事付之諸子一無所問更自號太平幸民
致和天曆之交行省強起公防遏松江海道事定表爲閩帥公
微聞之以親老力辭及太夫人以高壽終公年已耳順哀毀過
禮旣奉柩祔葬于昭毅公之左廬墓三年然後去太夫人所遺
服御之物悉以畀季弟其篤於孝友天性然也省臺交章列薦
略不動其意覃官之令下亦不自陳安常待終不疾而逝享年
六十有七所著抱膝軒吟若干卷清新高古有作者風騷弘吉
刺氏封武平郡君子男五人長宜孫嚴武德將軍沁海上萬戶
府副萬戶次文孫次德孫俱國子學生次厚孫今以昭信校尉

爲公海上萬戶府副萬戶次哈刺女三人長適恭不華

英宗龍飛進士第一今累遷翰林侍讀學士中奉大夫知制誥同脩國史餘在室昭信君以葬有日奉公門下士潘倬之狀以碑銘來屬濟幸辱游公父子間且與侍讀公同官爲僚不敢以衰朽不文爲解狀稱公倜儻似魯仲連淵深機密似李泌得士似魏公子無忌廉退似邵曼容至於料敵制勝論事剴切抑又公之所長人以爲知言銘曰

猗公之先爲時名臣運去物改不事二君逮其孫曾歸我真主累將重侯勲在盟府垂休五葉惟公敬承際逢熙運四方砥平專城坐鎮偃旗卧鼓海波不驚萬室按堵蟲蟲之細安足掃除小試之效特公緒餘公材則多敏而悅學九流百家由博而約經綸之妙出武入文歛藏弗耀抗志青雲時逾兩紀優游

事外嘯歌息偃春融蟬蛻積慶諸祉畀于後人提將之符榮戟
在門史所屢書公先四世嗣作公碑其尚無媿

嘉議大夫禮部尚書致仕于公神道碑

至正十三年九月己巳嘉議大夫禮部尚書致仕于公終于平
江里第享年七十有八以其年十月丁酉葬吳縣至德鄉洞涇
鴈蕩之原公諱文傳字壽道姓于氏于之得姓始於春秋時宋
大夫欒渚有蜀郡尉獻吳有軍師吉晉有將軍瓚著作郎寶史
氏所紀代不乏人其後有家于汴而仕于宋至武顯大夫者曰
思義於公爲六世祖武顯之子曰信於公爲五世祖建炎初與
其弟武節大夫恭扈蹕南渡僑居平江子孫因占籍焉高祖諱
振曾祖諱拱辰皆弗仕祖諱宗顯承信郎今贈亞中大夫鎮江
路總管輕車都尉追封潁川郡侯祖妣吳氏追封潁川郡夫人